

章氏遺書

章
序
通
志

卷之三

三

章氏遺書卷第二十七

湖北通志檢存稿四

蕭山王宗炎編次

吳興劉承幹校訂

陶葉張汪四節婦傳

艾氏四川什邡艾榮女前明興國陶彌妾也彌爲縣竹
知縣納之後房初陶娶於黃無子而妬陶納妾吳生子
數歲黃陽愛之因勸陶再納其兄女黃女性悍而妖欲
以奪吳寵也陶攜二妾至縣竹果不相能黃亦尋至姑
姪以計酖兒陶知之莫如之何第遣與俱歸遂嫁吳爲
農家婦陶又納艾艾年始十七端好寡言笑有寵於陶
後陶遷姚安通判攜艾過家與二黃異居二黃恨之已

陶貶官福建獨攜艾往黃愈不能平嗾其姪往制之艾卽退處一室日寧絕吾進御毋使官解有惡聲汚主君名陶已踰五十無嗣鬱憤而死黃妾恬不爲哀第自括其裝資爲再適計艾獨撫棺哭七日夜不食死死日囑其從者曰吾從主君地下無恨矣大婦恨未已葬之岔道三年大婦以惡疾死知州楊仁甫始遷艾合葬於陶王氏雲南王松雲女威寧府通判江夏葉方璁妾也年十五侍葉官舍次年生子體仁甫四月方璁卒官舍無親屬橐無餘積王脫簪珥鬻嫁衣裳歸喪數千里惟一老僕攜孤扶櫬遠道行程水陸頓遞部署井井歸事方璁母極孝奉嫡盡敬禮體仁長教之力學乾隆庚午舉

於鄉厯官淑州知府王封恭人乾隆二十七年旌

李氏竹山縣武舉張廷儒妾也生長揚州知書通大義未字而父母兄弟俱喪貧無所依適廷儒官徐州衛領運干總納爲小妻事廷儒母郭及大婦王能孝以順廷儒又納妾郝氏李友愛之當廷儒出運母妻相繼亡李書告廷儒請留郝官署而身奉君姑與嫡柩歸葬祖塋無稍愆禮郝氏生子李慈撫之門以內廷儒甚倚賴焉乾隆丙午夏廷儒失事遣戍潼關疾卒臨汾旅舍李年甫二十餘家貧無恃門無次丁李俾郝居守身跋涉奔喪變產不足攜廷儒十齡從子從一老僕走徐州謁同官告助猶不足則彳亍步行至臨汾收骨置櫬欲背負

歸會知縣聞其事深嘉歎之助以資斧輿馬得徑抵家
以禮安葬前後八年登涉水陸往返不啻萬里經涉南
北至六七部域部署行李艱難支絀喪葬禮節皆以娟
然一少婦咄嗟辦之人以是稱其賢能李旣以賢能持
家政郝亦傾意下之共撫遺孤成立然張族習尚多歧
李與郝謀攜其子別居僦舍俾就書塾人問何爲栖栖
自苦乃爾李曰孺子須慎蒙養吾恐如素之緇於染爾
郭氏廣西宣化人黃梅汪振玉妾也振玉乾隆癸酉舉
人以知縣鑄級補廣西凌雲縣丞道遠不能挈家就近
納郭年甫十八笄鑰內政條理周悉踰年振玉卒旁無
親屬喪殮大事皆郭主之其地風氣奸人鬻女爲官人

妾或一年或數年其父母若兄弟朝夕窺伺往往乘閒
傾倒而去郭父母覲汪死誘郭挈資行不可父母以道
遠且家有大婦脅之郭曰我非以父母命事汪丞乎父
母誠憐我當日何賣我遠宦今乃斬我從汪晚矣因戒
闔者絕其私親毋得入日盼汪親屬不至有老蒼頭素
愿朴郭使護行篋笥纖委條繫件記手自簿錄奉櫬登
舟晨夕奠餕水陸頓遞厯數千里歸登堂見大婦匍匐
叩頭相持哭盡哀出所簿記悉以歸公大婦謝曰吾分
爾也奈何以累賢姊命家中大小皆出拜之郭由是堅
閉一室以節自終

徐陳盧馬四節婦傳

汪氏興國徐先登妻也先登父客漢上得徽州商汪女聘焉汪機警解書義歸先登而翁歿以女紅助先登養母先登苦失業挈汪客都昌官舍爲幕客俄病且死與汪訣曰我先世七傳皆無兄弟我父又久客歿葬漢陽母老殘喘我又無子客死於此命矣夫生不識故鄉死將何歸我聞興國陽辛里州頭徐者巨族也汪泣諾之已而扶柩行舟汪弟自漢來省與舟子謀欲徑趨漢上爲汪謀再適計汪微知之斥責其弟厯數前後哀動鄰舟舟人亦責其弟而呵護之溯舟爲問州頭徐者汪親登陸詢訪同族鮮有知者惟一二耆年粗憶翁名指示故居及其先世墓藏汪遍拜先壠碑之求嗣子於宗人

宗人嫌其貧且年少莫肯爲繼汪至行乞養姑無顧之者居三年姑歿汪念翁櫬未歸子身溯江流至漢陽四百餘里風濤驚險屢瀕於危往反凡三閱月竟得翁柩歸里合葬其姑州人士咸感動事聞於官官爲求同族昭穆得七歲兒爲之後母子僑寓於節孝祠督兒書字紡績自食不以累族中人兒十歲危疾汪撫兒慟曰我忍死十四年爲兒也脫兒不濟七世先魂痛其餒爾兒病竟不起汪則櫛沐密縫周身衣裾投繯榻前懸身倒頸似顧其兒兒屍亦瞠目慘顧其母一時見者至爲菴哭失聲

張氏上元人江陵候選縣丞陳楚良妾也幼失父母不

可記憶言及未嘗不唏噓嫡毛甚相得居常言古節烈事輒感激不自禁楚良疾篤自知不起數顧張張以死誓楚良卒毛欲身殉張曰夫人子女尙幼未可以輕身也賤妾無繫宜一死報主君耳絕粒數日家人力勸不得死嫡以已生次子使撫之稱慈母張亦安之從容出華綺以進嫡分釵釧貽嫡二女初生女殤久矣一日忽如亡女塚哭盡哀時面東南延頸立久之無所言撫食諸幼倍常日一夕剪所服金銀衣鈕置几上內著衰麻外襲疏布授縕死毛悼甚詢其從婢曰哭殤女墓與之訣也東南立望其家也服飾付夫人示終身不復有也撫食諸幼求附空主塋久相依也再踰月矣數以屬我

我弗敢言於是家人相與太息毛憐其志厚葬從夫兆
域春秋無廢祀焉

張四姐黃安農家女生而整潔及笄贅盧氏子於家三
載盧歿四姐年二十七有遺腹子誓志堅守父母多男
子力不能贍諷以再醮四姐矢曰吾非愛死爲此孤也
十指猶在堪自活不以累親自是紡織藁砧刀剪緘紉
無停手示不徒食兒稍長俾從諸舅耕牧教督綦嚴凡
十三年兒以痘夭四姐埋兒近山每晨起輒開門向山
木立若癡入夜則兒鬼入夢嗁呼警怛聞者酸楚凡十
許日忽囑諸弟我死必營葬兒側以此報盧壻於地下
篋中錢布衣物足用不以累汝曹也言訖坐逝

陳氏某縣人年十八適馬之乾甫七月夫病疫死遺腹生子黑兒黑兒患風寒陳抱兒臥牀竟日姑詈之舅曰婦新寡未知其意所安何過詈爲陳聞之疑舅姑欲奪其志輒起盥洗拜舅姑謝過自是左右服勤不懈夜則檢篋中冬夏衣改製鬼衣隨年小大凡數十襲歸家迎其母來居數日母歸告曰兒寡婦未便數往還願母自愛勿以不時見兒爲念也是夜杜門投繯死明日家人聞黑兒號叩門不應啟視則不可救矣面色如生尸溫七日不寒於是舅姑乃大悔恨黑兒生十年服所製衣履盡亦暴亡每夜鼓二嚴所居室聞鬼哭兒聲三年不絕遠近聞者無不慘怛初之乾之死俗例疫死不合葬

遂葬之乾別阡至是族人憐之乃以陳及其殤子改祔
之乾祭而告之由是鬼不夜哭有石玖光者蓋爲之傳
玖光不諳文理故刪潤其說著於篇而傳稱陳氏爲葉
橋人葉橋隸何州縣故不可知而馬之乾并不知其何
里玖光皆未之著甚矣文法疏也玖光亦不知何許人
存之以俟知者

前志傳

夫經師有儒林之傳辭客有文苑之篇而史氏專家淵
源有自分門別派抑亦古今得失之林而史傳不立專
篇斯亦載筆之闕典也夫作史而不論前史之是非得
失何由見其折中考定之所從昔荀卿非十二子莊周

辨關尹老聃墨翟慎到之流諸子一家之書猶皆低昂
參互衷其所以立言況史裁囊括一世前人成轍豈可
忽而置之若夫方志家言汗牛充棟其中佳製十不一
聞由後追前難以討其底蘊其無專傳宜矣然大輅本
於椎輪藻飾起於太素則飲水思泉亦不容於竟略也
是以先考總志分別存亡證所授受略如儒林之述師
傳所謂本也府州縣志擇其爲人所稱道者條附而論
次之存千百於十一所謂支也并取足以供載筆之要
刪爲前志篇

自禹貢職方具有荊州紀載由斯以往楚書楚語見於
左氏春秋檮杌史名見於孟子楚策列於短長其所由

來久矣漢魏以降輿地圖經存於著錄往往不乏袁崧
有宜都郡記盛宏之有荊州記庾仲雍有江記宗檩有
荆楚歲時記習鑿齒有襄陽耆舊傳郭仲產有襄陽記
鮑堅有南雍記梁元帝有丹陽尹傳江州荆南諸志鄒
閔甫有楚國先賢傳余知古有渚宮遺事然其書俱百
不存一閒見於諸家采錄散篇斷句不可窺其全矣

湖北分省向無通志其未分省而修湖廣通志則前明
有成化嘉靖萬曆三家我朝有康熙甲子與雍正癸
丑二家今明志三家訪之藏書之家已鮮存者明刑部
侍郎何遷爲之序曰荆故無志志自成化甲辰始督學
山陰薛公爲之云閱四紀爲嘉靖壬午中丞東湖吳公

釐而益之今復四紀矣頃歲督學內山張公率同知袁子福徵鄉士知州陳子士元復釐吳公之舊析爲紀表書志傳內山擢去諸草皆散失中丞華元徐公柱史幼溪陳公相繼至乃屬督學小江吳公命學官弟子裒散失之餘而以整齊之役責於予俾撤凡而議焉會小江吳公亦擢去而鳳竹徐公以視學至却偕予郡守竹溪袁公造予山中予弗能謝載考傳記比事聯類於義可校覩通典通考諸編庶幾近之於是闢局却野相與載筆其間舉例陳體一準諸史前草編摩未竟者拓之逸後擴入不倫者正之并前二志蹈浮涉俚悉以義裁之然校核刪潤猶未遑也名宦人物疑信種種乃據摭諸

志指次其槩請於諸公下令郡邑取徵鄉評載焉未幾
鳳竹公復擢去學官弟子不至初草格而不行者復數
年予懼茲役之罪我也於是窮晝卜夜旁究其所未備
其甚率略於野者稍稍取而文之又踰二年乃脫草而
督學禹門姚公適至却益以印可值中丞汝泉趙公柱
史念庭舒公注視文獻得志本末乃率予郡守定宇馬
公采之山中以去顧予受簡於隆慶丙寅秋脫草於壬
申冬中閒學官弟子共鉛槧者僅一年餘皆獨治觀遷
之自序則在嘉靖之後萬曆之前按隆慶無丙寅之年
丙寅乃嘉靖四十五年是年穆宗卽位詔以明年爲隆
慶元年耳壬申之冬則隆慶七年神宗詔以明年爲萬